

Deporte Local

Champ of the Champs dedica na baluarte

Benjamin Rogelio "Roy" Angela di Sabana Grandi



ORANJESTAD (AAN)--- Dialuna 30 di Juni lo inicia e torneo internacional Champ of the Champs 2014 e di 8 edicion cual e aña aki ta wordo dedica na dos personahe den deporte Sr. Benjamin Rogelio "Roy" Angela y e otro ta Antonio Moreno (q.e.p.d). E ceremonia oficial lo tuma lugar diabierna 4 di Juli pa 7:45 pm. Awe nos lo amplia riba CV di Roy Angela mientras mas den siman lo publica esun di Antonio Moreno. Roy Angela a nace den Santa Cruz 31 di maart 1952 den bario di Sabana Grandi. Roy Angela felismente casa cu Ludwina Angela Hernandez pa 22 aña bibando na Barcadera den su pueblo stima di Santa Cruz. Roy ta bin di un famia di deportista manera su rumannan Crismo Angela, Goi Angela (q.e.p.d), Pedro Angela y Enrique Chino Thiel. Tambe Roy tin sobrinonan cu a

destaca den deporte entre otro Rock Angela, Poy, Sergio (De), Buchi Flanegin, Ronnie Angela y rumannan De Luvia, Tirso, Cay y Jochi, Jerry y Humfrey Agumbero. Mas sobrino cu a destaca den deporte ta Eric y Robert Thiel. Roy Angela y Deporte di Baseball. Bao guia di Chino Thiel Roy a cuminsa hunga baseball for di edad di 7 aña. Na edad di 8 aña Roy a cuminsa hunga den Little league. Roy asina a hasi huramento den Little league como e hungador di mas jong na 1961. Despues di a hunga 4 aña den Little league Roy a pasa over pa Junior league y a hunga pa un team di Savaneta "Anton Hunink" di Sr. Mario Angela. Desde aki Roy Angela a subi pa AA y a hunga un total di 24 aña den e klas mas halto na Aruba. Den decada 70 y 80 Roy na dos oportunidad a fungi como Manager

tanto di Santa Cruz Royals y Video Center. Mesun equipo aki tambe tabata conosi bao nombenan di Santa Cruz Stars y E. B. Sibone. Roy Angela a milita den seleccion di Antillas hungando na Caracas, den weganan di COPAN. Roy a forma parti di seleccion di Aruba cu a hunga 2 biaha na St Maarten y varios biaha na Corsow. Cu su propio equipo Roy a hunga baseball na Colombia, Costa Rica, Venezuela, St Maarten y Corsow.

Logronan di Roy Angela como pelotero

Na 1976 Roy a sali campeón homerun di Aruba cu e team di Sibone. Roy pa hopi temporada a bati riba 300 di averahe y semper tabata den top pa mas careda empuha.

Roy como tercera base tabata tin un defensa sublime y na edad mas grandi a ocupa primera base unda Roy tabata espectacular y sencasional.

Roy Angela conosi pa un hungador di mas di 200 liber tabata sa di roba basta base cu e peso aki lesando e pitcher na un manera unico. Roy su amor pa su equipo tabata masha grandi y Roy ta wordo recorda tambe como un hungador cu un temperamento basta halto.

Roy Angela den Futbol
Cu 10 aña Roy tabata activo den futbol. Roy su nivel di

futbol tabata uno hopi halto. Roy Angela a milita den seleccion di futbol di Aruba na edad di 18 aña. Roy a biaha cu futbol pa Surinam, Hulanda y Corsow cu Weganan di Reino. Na 1971 Roy a hunga contra hungadornan di Hulanda kendenan despues a hunga den mundial na 1974 y 1978. Esaki sigur ta mustra e calidad di Roy como futbolista. Roy su equipo di futbol tabata Atlantico Deportivo. E ta recorda su compañeronan di team manera Jonco, Ziek y Foyito Alberts, Wim, Robbie, Ovi Thode, Buchi Flanegin, Maiky Rojas, Ben, Tori y Bano Flanegin, Tojanchi Willems, Netto Pieters y Chino Thiel pa nombra algun.

Cu Futbol Roy a biaha pa Costa Rica, Corsow, Bonaire y Hulanda. Su mihor momento tabata na aña 1971 momento cu el a wordo aserca pa doño di Millonarios di Colombia pa un contract di 3 luna cu tur cos paga pa waak si e por logra yega na firma. Millonarios tabata e equipo campeón na Colombia e tempo aya. Motibo cu Roy no a bay Colombia tabata motibo hopi tristo y di lamenta. Algun compañero di Roy su propio team, kendenan kisas no tabata kier a perde Roy como hungador, a haya ta bon pa manda gaña dirigenan di Millonarios cu Roy Angela tabata den rolstoel cu un pia kibra. Esaki a costa e oportunidad grandi y unico di Roy su carera cual a bay perdi. E amor di Roy pa su equipo tabata asina grandi cu apesar di esaki Roy a despena esnan cu a comete e acto aki y a keda cu su equipo Atlantico.

Roy Angela hungando deporte di Softball

Pa 19 aña Roy tabata activo den softball cu teamnan Silvasport, Chuchubi, Honda, Blue Stars, Video Center y Pueblo.

Cu softball ela representa Aruba na Corsow, Venezuela y Costa Rica. Roy a forma parti di seleccion di softball di Aruba, e semper tabata un di e mihor batenan den tur equipo cu el a milita.

Roy como deportista hungando e deporte di Billiard Roy a hunga Billiard pa 25 aña riba e nivel mas halto na Aruba.

Roy Angela tabata un hun-



gador di taya unda apostadornan tabata hasta bet riba su man.

E hunga pa Sport Boys, Technicos Santa Cruz. Cu Technicos ela a representa Aruba na Republica Dominicana, Corsow, Costa Rica y Venezuela. En general mester accentua cu tur deporte cu Roy a practica e tabata sa di hasi esaki riba e nivel di mas halto hungado semper cu amor y pasion pa e team cu e tabata forma parti di dije na e momento ey.

Roy Angela a retira y a cuminsa explora carera nobo como comentarista deportivo. For di 1998 Roy a inicia e carera aki hunto cu Dochi Lee transmitiendo weganan di Sidney Ponson for di internet pa e pueblo di Aruba via un emisora na Santa Cruz.

Na 2002 Roy a cuminsa cu un programa deportivo hunto cu Roberto Geerman na un otro emisora di radio.

E programa yama "Deporte dot com" y tin 12 aña den aire unda tur mainta Roy ta informando pueblo di tur acontecimientos deportivos. Roy tabata tin un programa deportivo un tempo na un otro emisora di radio y a la vez ta yuda como comentarista di Boxeo na ATV.

Roy sa traha como comentarista di baseball na un televisora local cu transmisionan di Grandes Ligas. Roy Angela ultimo 5 aña ta den team cu Amador Oduber y Alex Falconi hunto cu Bo Guia Deportivo. Roy Angela simplemente un baluarte den deporte. Merecidamente Champ of the Champs 2014 dedica na honor di Roy Angela.

Roy Angela masha masha pabien y danki pa Bo aporte na deporte en general.